



Inatsisartunut ilaasortaq, Sofie Geisler, Inuit Ataqtigiit
Maani/

§ 37 naapertorlugu apeqqutip nr. 307-ip akineqarnera

Inatsisartut Suleriaasianni § 37, imm. 1 naapertorlugu Qeqertarsuup Tunuani qaleralinnut pisassiissutit ilaneqarnissaannut tunngatillugu Naalakkersuisunut apeqquteqarsimavitit. Apeqqutit suliassaqarfignannit akineqartussanngorlugit innersuunneqarput.

Naalakkersuisunut apeqqutigisat:

Apeqqut 1: §37_152/2019-imi, apeqq. 2-mut, Naalakkersuisut akissumminni allapput "Tulaanneqartut agguaqatigiissillugu angissusaat, aalisartut angallamminni allattuvii malillugit oqummersamut ataatsimut aalisakkat pisaasartut kiisalu uumassusilerituut kilisaatinik qassutinillu misissuinerinit piffissami pineqartumi aalisagaqatigiit milliartulersimasut takuneqarsinnaavoq. Aalisagaqatigiit milleriaraangamik annerit utoqqaanerillu ikileriarnerinut takussutissaasarpoq, taamaattumillu aalisakkat tulaanneqartut mikinerusarput. Pisassiissutitaqanngitsunik aalisarneq Qeqertarsuup Tunuani aalisarnermut tamarmut ilaammat pisassiissutitaqanngitsumik aalisarneq aalisagaqatigiinnik ikiliartornerannut aamma peqqutaaqataavoq."

Naalakkersuisut tusagassiuutinut nalunaarumminni 7. August 2019 ullulikkami ilaatigut aamma ima allapput: "...Naalakkersuisut siorna aalajangerput aqutsiveqarfinni Qeqertarsuup Tunuani aamma Upernavimmi qaleralittassiissutigineqartut TAC-at, akuerisaasumik pisarineqarsinnaasut, ilisimatuussutsikkut ukiuni tulluuttuni sisamani innersuussisarnernut naleqqussarneqartalissasut."

- Taava suna pissutaava Naalakkersuisut 6. September 2019 aalajangermata Qeqertarsuup Tunuani sinerissamut qanittumi qaleralinniarnermi pisassat 2.400 tonsinik ilaneqassasut, taamaasilluni ilisimatuussutsikkut innersuussutigineqartuniit pisassat 5.460 tonsinik amerlanerulissallutik?

Akissut: Eqqorpoq Naalakkersuisut 2018-imi Qeqertarsuup Tunuani Upernavimmilu qaleralinnut pisassiissutit killilimmik ilanngartaleriarlugit aalajangermata, matumani siunissaq ungasinnerusoq eqqarsaatigalugu ilisimatuussutsikkut siunnersuinerit qanillattonnissaat anguniarlugu aammalu siunissami piujuartitsinermik tunngaveqarluni aalisartoqarnissaa anguniarlugu.

Ukioq manna aqutsiveqarfimmi Qeqertarsuup Tunuani qaleralinniarneq ingerlalluarsimavoq. Tamatuma kingunerisimavaa ukioq manna pisassiissutaasut tamarmik naatsorsuutigisamiit siusinnerusukkut aalisarneqarsimammata. Pisarineqartartut sapaatip akunneraniit sapaatip akunneranut malinnaaffigaavut, ukiorlu manna umiatsiaaqqanut pisassiissutigineqartut septembarip qiteqqunnerani aalisarneqareersimammata Naalakkersuisut nalilersimavaat pisassiissutit ilaneqarnissaat pisariaqassasoq umiatsiaaqqanik aalisartut tunisassiorfinnilu sulisut ukiup sinnerani suliffissaqartinnissaat qulakkeerniarlugit.

Taamaammallu Naalakkersuisut ullormi 6. september aqutsiveqarfimmi Qeqertarsuup Tunuani qaleralinnut pisassiissutit ilaneqassasut aalajangerpaat umiatsiaaqqanik aalisartut ukiup sinnerani qaleralinniarsinnaanissaat qulakkeerniarlugit. Taamaalillunilu ukioq manna pisassiissutit ilaneqarnissaannut tunngavigineqartoq suliassaqartitsiniarnerunermik annermik pissuteqarpoq.

Apeqqut 2: Nunarput tamaat isigalugu, aammali Qeqertarsuup Tunuani sinerissap qanittuani qaleralinniarneq eqqarsaatigalugu MSC-mik meqqilersuinermut qanoq

Ulloq: 24-09-2019
Suliap normua: 2015-14973
All. nr.: 11635000

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

sunniuteqassava ilisimatuussutsikkut innersuussutigineqartuniit pisassiissutigineqartut maanna 5.460 tonsinik amerlanerulersinneqarmata?

Akissut: Apeqqu 1-imut akissutigineqartoq nangiinnarlugu oqaatigissavara MSC-mi tunngavigineqartunut tunngatillugu aalisarnerup piujuartitsinermik tunngaveqarluni aalajangiusimaannarnissaa pingaaruteqarmat eqqortuusooq. Soorlu siuliani taaneqareersoq ukioq manna pisut kingunerisimavaat pissutsit allatut ajornartumik nalilersoqqittariaqaleratsigit. Massakkorpiaq Kitaani avataasiorluni qaleralinniarneq kisimi MSC-mik uppersaasarsugaavoq, isumaqarlunnarpugullu pisassiissutinik ilasineq tassunga sunniuteqarnavianngitsooq.

Apeqqu 3: Quppernermi uani:

<https://naalakkersuisut.gl/da/Naalakkersuisut/Departementer/Fiskeri-Fangst-og-Landbrug/Fiskeriafdelingen/TAC-og-kvoter/ilaatigut/aamma/atuarneqarsinnaavoq>:
"Pisuussutinik uumassusilinnik atuinermi piujuartitsinermik tunngaveqarluni ingerlatsinissaq Naalakkersuisut pingaartippaat. Tassanilu aalisakkanik pisuussutigut aqutsivigineqarneranni ilaatigut pisassiisarneq ilaavoq."

- Naalakkersuisut suli isumaqarpat Qeqertarsuup Tunuani qaleralittassanik qaffaaneeq piujuartitsinermik tunngaveqarluni aalajangererusooq?

Akissut: Qeqertarsuup Tunuani pisut aalisartunut taakkualu ilaqaannut ilungersunarsimavoq, Naalakkersuisullu allatut ajornartumik pisoq nalilersorsimavaat aalisarnerlu qulakkeernarsimallugu, taamaalillunilu ukiup sinnerani isertitassatigit periarfissat qulakkeerlugit. Pisumi uani pisassiissutit ilaneqarnissaat pillugu aalajangerneq aaqsiissutissaqqinnerpaatut nalilernerqarpoq. Soorlu aamma taaneqareersoq aalajangiineq suliffissaqartitsiniarnermik tunngaveqarluni pivoq.


Apeqqu 4: Apeqqu 3-mut akissut aappiuppat: Piujuartitsinermik tunngaveqarluni aalajangiineruppat tamanna qanoq Naalakkersuisut tunngavilersorpaat?

Akissut: Apeqqu 3-mut akissutigineqartut innersuussutigineqarput.

Apeqqu 5: Naalakkersuisut ulloq 9. September 2019 tusagassiuutitigut nalunaarutaat innersuussutigalugu: Qeqertarsuup Tunuani killilersugaanngitsumik qaleralinniarfiup taamatut atugaanera qaqugu Naalakkersuisut atorunnaarsissavaat, aammalu aalisarnermut akuersissutit nutaat qaqugu Naalakkersuisut killilissavaat?

Akissut: Eqqorpoq Naalakkersuisut qaleralinnut pisassiissutit ilaneqarnissaannut atatillugu Qeqertarsuup Tunuani, aalisarfiit pisassiissuteqarfiunngitsut atorunnaarsinniarlugit aamma Qeqertarsuup Tunuani umiatsiaaqqanik aalisartunut aalisarsinnaanermut akuersissutit nutaat tunniunneqartarnerat unitsinnissaat pillugit sulissuteqartoqarnera pillugu Naalakkersuisut nalunaarmata. Sulineq tamanna aallartereersimammat nalunaarutigineqassaaq. Tamatumunnga peqataasut ilisimatinneqartarnerat ingerlaannassaaq.

Inussiarnersumik inuulluaqqusillunga



Jens Immanuelson

Aalisarnermut, Piniarnermut Nunalerinermullu Naalakkersuisooq